



---

**Pekeliling Ketua Pengarah Tanah Dan Galian Persekutuan  
Bilangan 5/2009**

**Pelantikan Penjawat Awam Sebagai Pegawai Pengawal  
Tanah Rizab Kerajaan**

---



**JABATAN KETUA PENGARAH TANAH DAN GALIAN PERSEKUTUAN  
KEMENTERIAN SUMBER ASLI DAN ALAM SEKITAR  
PUTRAJAYA**



## **Pekeliling Ketua Pengarah Tanah Dan Galian Persekutuan Bilangan 5/2009**

### **Pelantikan Penjawat Awam Sebagai Pegawai Pengawal Tanah Rizab Kerajaan**

#### **Tujuan**

Pekeliling ini dikeluarkan bertujuan menasihatkan Pengarah-pengarah Tanah dan Galian Negeri dan Pentadbir-pentadbir Tanah mengenai pelantikan penjawat awam sebagai pegawai pengawal tanah rizab kerajaan selaras dengan pindaan kepada Kanun Tanah Negara (KTN) melalui Akta Kanun Tanah Negara (Pindaan) 2008 [Akta A1333] yang berkuat kuasa pada 1 Januari 2009.

#### **Latar Belakang**

2. Sebelum pindaan kepada KTN, pelantikan pegawai pengawal di bawah perenggan 62(2)(c) KTN bagi tanah-tanah rizab kerajaan sama ada tanah rizab kerajaan Persekutuan atau Negeri telah banyak menimbulkan masalah kepada Pentadbir Tanah untuk menentukan pihak mana seharusnya dilantik untuk mengawal dan memajukan tanah rizab kerajaan. Terdapat juga Pihak Berkuasa Negeri (PBN) yang telah melantik Pihak Berkuasa Tempatan (PBT) atau badan-badan berkanun sebagai pegawai pengawal bagi tanah rizab negeri.

#### **Pelantikan Pegawai Pengawal Tanah Rizab Kerajaan**

3. Berikutan dengan pindaan kepada perenggan 62(2)(c) KTN melalui Akta A1333 (selepas ini dirujuk sebagai "Akta ini"), pelantikan pegawai pengawal bagi semua tanah rizab kerajaan sama ada tanah rizab kegunaan kerajaan Persekutuan atau kerajaan Negeri hendaklah daripada kalangan penjawat awam sahaja. Pegawai-pegawai dari PBT, badan-badan berkanun, pertubuhan atau mana-mana agensi tidak dibenarkan lagi dilantik sebagai pegawai pengawal bagi tanah-tanah rizab kerajaan sama ada tanah rizab untuk kegunaan Kerajaan Persekutuan atau Kerajaan Negeri.

4. Walau bagaimanapun, PBT atau badan-badan berkanun atau mana-mana agensi atau pertubuhan boleh dilantik sebagai pihak yang mengurus atau menyelenggarakan tanah-tanah rizab itu. Sebagai contoh, kawasan tanah lapang diwartakan sebagai tanah rizab kegunaan awam dengan dinamakan Setiausaha Kerajaan Negeri (SUK) atau Pegawai Daerah sebagai pegawai pengawalnya dan untuk tujuan pengurusan atau penyelenggaraan tanah rizab tersebut diserahkan kepada PBT.

5. Seksyen 3 Akta Tafsiran 1948 dan 1967 [Akta 388] mendefinisikan penjawat awam sebagai:-

"public officer" means a person lawfully holding, acting in or exercising the functions of a **public office**.

"public office" means an office in any of the **public service**.

"public services" means the public services mentioned in **Article 132(1) of the Federal Constitution**.

Oleh yang demikian, penjawat-penjawat awam adalah terdiri daripada pegawai-pegawai kerajaan dari perkhidmatan-perkhidmatan awam selaras dengan perkara 132(1) Perlembagaan Persekutuan, termasuk perkhidmatan awam Persekutuan dan Negeri.

### **Pemakaian**

6. Mana-mana pegawai yang dilantik sebagai pegawai pengawal tanah rizab di bawah seksyen 62 KTN sebelum tarikh permulaan kuat kuasa Akta ini, akan terus kekal sebagai pegawai pengawal melainkan jika pegawai berkenaan meletakkan jawatannya atau pelantikannya dibatalkan.

7. Pelantikan mana-mana pegawai sebagai pegawai pengawal tanah rizab di bawah seksyen 62 KTN pada atau selepas 1 Januari 2009 adalah tertakluk kepada kuat kuasa Akta ini.

8. Pekeliling ini hendaklah dibaca bersama-sama dengan Pekeliling Ketua Pengarah Tanah dan Galian Persekutuan Bil. 9/1973 – Pelantikan Pegawai untuk Mengawal Tanah Rizab Persekutuan (Disemak 2007).

### **Tarikh Kuat Kuasa**

9. Pekeliling ini dikeluarkan dengan persetujuan semua Pengarah Tanah dan Galian Negeri dan Jabatan Peguam Negara, mula berkuat kuasa dari tarikh kuat kuasa pemakaian Akta A1333.



**(DATO' ABD HALIM BIN AIN)**  
**KETUA PENGARAH TANAH DAN GALIAN PERSEKUTUAN**

No. Fail: JKPTG(S)/101/KPU/SP&P/1032-3 Jld. 6  
Tarikh: 1 Jun 2009